

जैल थै, वील पै

नवीन जोशी,  
ब्यूरो प्रभारी, राष्ट्रीय सहारा, नैनीताल

.....पैल दृश्य.....

(नैन्ताल में लाकड़ोकि पाल वाल हॉस्टिलोक एक कम्प, तीन चारपाइ तीन कुणन में— तीनों कै दगाड़ एक-एक कुर्सि मेज, किताबोंकि रैक बेतरतीब ढंगैल लागि रई। द्वि चारपाइन में बिस्तर बेतरतीब फैलि रई, तिसरि में यस लागणौ—क्वे सितिरौ। चौथ कुण वाइ चारपाइ ठाड़ि छु। ठीक ठाक ढंगैल लागी मेज-कुर्सि में भैटी लौंड पंखि ओढ़ि बेर एक मशीनाक पुर्ज के अलटि-पलटि बेर चाणौ और मेज में लागी ड्राफ्टरैल वीकि ड्राइंग बणूणौ। कम्प्राक बीच में तीन लौंड भैटि बेर ताश खेलणई और बिड़ि फुकणई। सामणि लुवाक डंड लागी एक मोरि छु, वीक माथि में लागी घड़ि राताक साढ़ि बार बजूणै। कम्प में बिजुलिक एक बल्ब जगि रौ। मोरिक द्वार खोलि एक डंड निकालि बेर पंखि ओढ़ी एक लौंड भितर फटक मारि बेर ऊणौ—सब वी उज्याणि चाणई। पर्द उठू)

ताश खेलणीं एक लौंड — अरे हरिया! देखि आछै पिक्चर, को वाइ देखी, 'ए' या 'यू' ?  
हरी — अरे यार हम 'ए' क्लास वाल मैस भयां, 'ए' क्लासै देखुंल। 'यू' क्लास देखणी नान तिन जै कि भयां, ज्वान है गयां यारो ज्वान..... (लुवाक डंड कै वापिस मोरि में फसू, फिर जो चारपाइ में मैस सिती जस लागणौछी, उ बिस्तर कै समेटू)

दुसर — यार त्वील हमूकै बतायै नै, नतर हमि लै ऊना त्यार दगाड़, कसि छु पिक्चर ? चलो, भो सई। भोहुं देखि ऊंल हमि लै।

तिसर — यार हरिया, आज माल रोड में त्येरि भौतै नरै लागी यार। तु हुनै बातै और हुनि, माज ऐगो यार। आ भैट, धुं उड़ालै ? श्वेतांबरी पिलै कि पीतांबरी, या दिगंबरी चुसलै ?

हरी — दिगंबरी में अल्लै दयेखि बेर ऐ रयू (हसू), श्वेतांबरी त्यार पास हवेलि नै। रोजै हारछै, डबल निमडि ग्याय हुनाल त्यार। किलै खिचरोइ करछै, ला पितांबरी ई प्यवा।

(तिसर बिड़िक बंडल हरिया उज्याणि लफू, हरी बिड़ि जगू, एक फूक मारू फिरि खांसू)

तिसर — त्वील दिगंबरी दयेखि हुनैलि, हम लै लागि रौछियां आज एक पिंगई अंबरी काकड़ा फुल्यूडक पिछाड़ि.....

पैल — (रोकि बेर, गीत जस गाणौ) का... कड़ा फुल्यूड कसी....

तिसर— टक-टका-टक लागि रैछी कमला माल रोड में, (गीत गैण लागू) टक-टका-टक कमला.

....  
हरी — (आजि खांसणै में छु, पढ़णी लौंडक उज्याण शान करि बेर) मणीं सजोलि बुलाओ, कै 'गुणि' बुकाल....

तिसर — 'गुणि' न कौ यार उथै, रमेश न कै सकनै, एक रमेशै त छु जो पढ़ाई में हमार कौलेजैकि शान छु। बाब बकार चरुनी बल मैसूक। बड़ि परेशानील इंजीनियरिंग करुणई लौंड कै, यां हौस्टिल में लै धरि राखौ। लौंड लै भल गुणी छु....

हरी (रोकि बेर, दार्शनिक भावैल) — तबै त कूणयू यार उहू 'गुणि', गुणी मैस अच्यान गुणि ई कईनीं। उसी लै य गणणक जुग छु यारो, गुणनक न्है। गुण और गिन्ती में अच्यान गिन्ती ई जितै।

(सब हंसनीं)

तिसर — लौंड भय त यार रमेशै भै। यार, के लै कओ, दयखो धै कतू मिहनत करणौ। कस लागिरो पढ़ण में, हमार कल्याट है बेखबर है बेर। ऐल रात साढ़ि बार बाजी तलक तैकि ड्राइंग बड़णै। और एक हमि छां, तास खेलण्यां और खिचरोइ में लागि रयां य फाइनल इन्त्यानौक

बखत में। अल्लै पड़ि जूल चारपाइन में, और रमेश रात्ती छीक नीन खुलैलि कै भिं में सितल....  
(आपण खर पकड़) शरम ऊण चें या हमूकें।

पैल – अरे शरम चनरैकि औलादा ! चुप कर यार, मूंड खराब नि कर। पत्त दिखा पत्त। जब हारलै तब आलि तुकें शरम।

तिसर – शरम त उ दिन आलि यार ज दिन रिजल्ट आल (पत्त ख्यडू) मकें हारियै समझियै यार, में हिटू आब।

(कम्र में बै भ्यार निकसि जां। और सब लै हुवां-हुवां कै उठनीं, आंखन में नीन दयेखीणै-पर्द गिरू)

-----दुसर दृश्य-----

(हास्टिलौक वी कम्र, सब बिस्तर बांधि बेर धरि रई। आपण-आपण बक्सन में लौंड समान टांजणई। तिसर लौंड कम्र में ऊं, कम्र में चार लौंड पैली बै छन, चारों दगाड़ हाथ मिलू)

तिसर – (रमेश थें) बधाइ हो यार, मकें पैलियै बै पत्त छी तु पैल आलै कै, कतू ऐरै परसन्टेज ?

रमेश – के खास न्हें यार – पिछत्तर छु करीब, और त्येरि ?

तिसर – न पुछ यार, किलै शरमिंदा करुंछै। वी छन त्यार पाटनरों कै जास हाल। गनीमत छु-पास है गोयूं। (मणीं रुकि बेर) यार म्यार डिमाग में एक ख्याल ऐरौ बड़ जोरौक (और लौंडौक उज्याणि चै बेर) अरे हरिया, दिपुवा, ललुवा ! यथ आओ यार, मैं एक बात कूण चांगयूं सबूं थैं। (सब वीक सामंणि ऐ जानीं)

हरी – कि खुराफात छु त्यार डिमाग में सुरेशा ! भलि खुराफात उनीं त्यार डिमाग में लै। पर एक खासियत छु तुमें, औरू कें सीप सिखै दिंछै पर खुद आपंणि सीख में न चलनै।

पैल/दिपू – (हरी हु) मोरिक डंड निकालि बिस्तर में आपण भैम बड़ै बेर पिक्चर दयखण हुं जाण लै कि तुकै तैलै सिखाछी।

तिसर/सुरेश – नैं नैं यार, तसि बात नि भै। ख्याल या आइडिया कूनीं जथें, बड़ि कमालैकि चीज हैं यार। और इनर अदल-बदल करते रूण चैं। (दिपू थें) चल बता, तू और मैं आपण एक-एक रुपैं आपस में बदलि ल्यूल त हमार पास कतू रुपैं है जाल ?

दिपू – एक-एकै रौल।

सुरेश – पर जो हम आपण एक-एक ख्याल बदलि ल्यूल त...?

दिपू (सोचि बेर) द्वि-द्वि ख्याल है जाज द्विनौकें पास। यार सुरेशा, त्यर डिमाग लै यार! सांच्चि में शैतानक घर छु। पर तु आजक आपण ख्याल त बता।

सुरेश – (भावुक है बेर) यारो दयखो, हमार इन्त्यान पुरी ग्येई। रिजल्ट लै ऐगो। भगवानै किर्पैल पास लै है गयां, हमौर दगड़ इतुकै छी। है सकूं हमूकें जीवन में मिलणौ मौक फिर कब्बै न मिलौ। पर हम एक मिलणक मौक बणै सकनूं यार। मैल एक कागज बणै राखौ, जमें ल्येखि राखौ कि हम आज बै ठीक बीस साल बाद आजाकै दिन यैं फिर मिलुंल। जो छु मंजूर त मिलाओ हाथ (हाथ अधिल करूं, और सब लै एक-एक कै एकाक मांथि में एक हाथ धरनीं, फिरि कागज में दसखत कर दिनीं)

सुरेश – (रमेश थें) और रमेश, बता यार कि सोचि राखौ त्वील अधिलाक तैं, कैं लगै राखछै नौकरीक जुगाड़ ?

रमेश – यार हम जासूंक कि जुगाड़ ? पर भलि परसन्टेज छु म्यार पास, कैं न कैं लागिई जूल। एक कॉल लेटर लै ऐरौ नोएडा बटी एप्रेंटिसाक तैं, दयखनूं कि हुं।

दिपू – यार मै त पीडबुलडी में लगूणयूं जुगाड़। वां भलि चलि रै बल यार, म्यार काक लै छन वां। खालि हांजरि लगूण और तनखा लूण हुं जाण पणूं बल औफिस।

हरी – अरे इरीगेशन में त है लै भल छु बल यार। वां त फील्ड जौबाक नौं पारि हांजरि लै आफ्फी लागि जै बल, बस तनखा में बै परसन्टेज लिनीं बल।

सुरेश – (हंसन-हंसनै) ततू खुशि किलै हुणैछै...? परसन्टेज आई कतू रै त्येरि, कां बै दयलै ?

हरी – अरे यार, मै इन्त्यान में आई परसन्टेजैकि बात न करनौय। उ परसन्टेज के को पुछूं अच्यान। (दार्शनिक भावैल) जुगाड़ चै जुगाड़, और जेब में चैनी हरी-हरीं नोट, यास (जेब बै नोटोंकि गड्डी दयखू)

सुरेश – ठीक कुणैछै यार, हरीं-हरीं नोटै चैनीं, और उं त्यार पास निमखण भाय, जुगाड़ाक तै बाब इरीगेशन में ठेकदार भायै त्यार। नौं 'हरी' (जोर दिबेर) भयै त्यर...(हसूं, और सब लै हंसनीं) (अचानक रुकि बेर) पर यार आम काबिल लोगनके तनखा कै लाल भाय। (दार्शनिक भावैल) एक जमान छि बल यार जब कामगारन के तनखा मिलछीं बल। तब मैस आपण परिवारक तन भरि, ढकि लिछीं। फिरि 'बेतन' मिलण लागौ। चलो कसीकै उधार लि दि बेर गाड़ि चलि जांछी। आब त 'पे' मिलें। आज मिलें, भो बटी दुकानदारों के 'पे' करणि पड़े बल।

ललू – यार मै त काशिपुर जूल, म्यार म्मज्यू ध्यूकि फैक्ट्री लगूणई वां। मकै लै जिड़ै'ई दयाल।

रमेश – और सुरेशदा, तुमि बताओ, तुमर कि छु पिलान ?

सुरेश – यारो ! हम त नेता प्रवृत्तिक भयां, कि धरि राखौ य नौकरीक चक्करन में। भीमताल में नई फैक्ट्री खुलणई बल। वैं लगूल तम्बू, जिन्दाबाद-मुर्दाबाद। बड़ि तागत छु यारो इनुमें। के नि करो, बस करो, ज्यूनौंकि मुर्दाबाद, मरीनैकि जिन्दाबाद....।

ललू – तस करणैल कि हवल ?

सुरेश – ऐ जा तु लै म्यार दगाड़, फिरि बतूल। अरे पगला ! आंदोलन करूल, बेरोजगारोंकि फौज के आपण दगाड़ करि ल्यूल। बस द्वि-चार नारै त चैनीं, त्वे जास मूरखनैकि कमी जै कि छु दुनी में, पिछाड़ि बै अणसोची हिटणियोंकि।

ललित – त कि तस करि बेर लै नौकरि मिलि जांछै ?

सुरेश (ललित हु) – अरे घुरुवा, तु कटकी रौ मणीं ! जब-तब के न के पुछड़ैं में रुंछै (रुकि बेर सवाल पुछू) अरे ककै हैरै नौकरीकि ? (जोर दिबेर) नोट चैनीं नोट। फैक्ट्री वाल लि दि बेर तम्बू हटूणैकि तै बात न करला मिं हुं। बस नोट लिह बेर मै चुप। द्वि-चार लौडों के लै लगै सकनूं मै वां। रमेश, तु हिटछै कि ?

रमेश – न यार, म्यार कई न है सकल तस। पैली मै य इंटरम्यू दि ल्यूं यार, फिरि ल्यूल त्यर ट्यक। फिरि त्यारै दगाड़ ऊण छु।

(य बीच चार कुल्लि ऐ ग्येई)

दिपू – यार रमेश, के गल्लि हैगे हुनली मांफि दियै यार, गाड़िक टैम हैगो, ऐल हिटनूं। (कुल्लि वीक समान उठूं, रमेश दगै हाथ मिलै बेर म्यार हुं निकलूं)

हरी – हम लै हिटनूं यार, ललुवा हिट तु लै। अच्छया रमेश फिरि मिलुल 'बीस साल बाद'।

(बड़ि ढबैल कूं)

(कुल्लि उनार समान उठूनीं, तीना-तीन हात हलकूनै हिटि दिनीं)

सुरेश – अच्छया यारो, याद धरिया बीस साल बाद मिलणौक करार (म्यार हुं हाथ हलकूं) (रमेश थै) अच्छया यार मिं लै हिटुल आब, तु लै किलै न हिटनै दगड़ै ?

रमेश – तु हिट यार, मिं जरा वार्डन स्यैपूं थें मिलि बेर ऊल। उसी लै यार त्यर-म्यर दगड़ लंब जै कि भै। फिरि तु हिटलै लै लमा-लम कुल्लिक दगाड़। म्यार पास समान लै हवल एक ब्वज।

सुरेश – मिलते रये यार कि चिटिठ दिये। म्यर पत्त भयै त्यार पास। अच्छया हिटूं।

(हाथ मिलूं, फिरि न्हें जां। रमेश जरा देर ठाड़ रुं, आपण समान कै चां, फिरि भितर हुं न्हें जां। पर्द गिरूं)

.....तिसर दृश्य.....

(होटलक कग्र, सामांणि दिवार में क्वे तुल पेंटरैकि पेंटिंग लागि रै, जमें पांच घ्वाड़ इथां-उथां हुं दौड़नई। सोफा स्यट में करीब चालीसैकि उग्राक चार मैस मैटि सिगरेट फुकणई। दवार में क्वे खट-खट करणौ)

एक (सफेद लुकुड़न में छु, नेता जस लागणौ) – को छै रे, ऐ जा (मनै-मन) सैद रमेश ऐगो।

(ख्वार में सांफ बादी होटलौक कर्मचारि भितर हुं उ)

कर्मचारि – सर, कोई मिस्टर रमेश हैं।

दुसर (कमीज पैंट में छु) – हां, हां, उन्हें बुलाओ।

(कर्मचारि भ्यार जां, मणीं देर में वीक दगाड़ एक कोट पैंट पैरी मैस भितर ऐ जा)

मैस – दगड़ियो नमस्कार, मैं रमेश। (नेताक उज्यांणि शान करि बेर) नेताज्यू तुम त सुरेश हवाला, पर...। (दुसराक उज्यांणि शान करि बेर) तुम ललित... (तिसार हु) तुम दीपक... और तुम... (चौथ हु) हरित। (मणीं रुकि बेर) ठीक पछ्याणछा मैल कि गल्लि हैगे के ?

सुरेश – यार! त्पर लै जवाब न्हैं यार। त्वील सबूकें ठीक पछ्याणौ पर हम सब एक दुसरा के पछ्याणण में मणीं गल्लि करि ई गयां। (कर्मचारि थें) चाय और बिस्किट। (कर्मचारि मणीं ख्वर टोर करि न्है जा)

सुरेश – होइ यार रमेशा ! त्पार ऊण है पैली हमूंह आपणि राम काथ लगे राखछी। य दीपक पीडबुलडी में लागछी। पनर साल ठीक-ठाक नौकरी करी। एक घप्लाक चक्कर में अच्यान सस्पेंड छु। य ललित आपण मामैकि घ्यूकि फैक्ट्री में लागौ। पैली फैक्ट्री ठीक-ठाक चलछी, पर य ग्लोबलाइजेशन, ग्लोबल मंदीक दौर में विदेशि रिफाइंड फैक्ट्रिनाक मुकाबल में देशि घ्यूकि फैक्ट्री कां टिकि सकनीं। फैक्ट्रीक दगाड़ यैकि हालत लै खराबै छु अच्यान। बखतै खराब छु यार कि कई।

रमेश – और हरिताक कि हाल छन इरीगेशन में ?

दीपक – हाल कि छन, बिहालै छन हमरी चारि। उ कि कूनी दुंग में ध्वे हाड़ में सुखै वाई बात हैरै। इरीगेशन में एप्रेंटिस करि बेर त एक टुलि नामी फैक्ट्री में लागौ। कोप कुणौछी, सरकारि टैक्स और सब्सिडीक टैम पुरी गो बल वां। आब उ ढब-बिढबैल कर्मचारिनैकि छुटिट करि भाजणैकि फिराक में छु बल। इलाक में उ टैम लागी और फैक्ट्रि लै सब्बै अधबीचाक जंगार साबित भई। आब यैक तै लै घर जूलौ बाब रिसाल, बण जूलौ इज रिसालि वालि हालत है रै।

रमेश – और तुमर कस चलि रौ सुरेश दा, तुमरि नेतागिरी में न त सस्पेंड हुणक खतर भै न धंध मंद या बंद हुणाकै क्वे चांस भाय। क्वाप कूनीं उ-तुमार त पाचूं आंगुल घ्यू में और ख्वर भदयाइ में वाल डिपाट भय।

हरित – अरे यार रमेश ! यं त यार अन्हावैकि चोट कन्हाव मारणीं वाल भाय। लागि गयो छक्क नतर मुक्क खाणक हिसाब भय। पर अच्यान नेतागिरी लै कि भरौसक काम जै कि रैगो।

समाजैकि भलाइ करणीं नेताओं दगै पार्टी वालों के मल्लब न रून ओर जन्ता लै उनूकें चुत्ती जस समझें। असल में अच्यान जन्ता के लै नेता नें अभिनेता चैनीं, जो बखत पर डाड़ हालि दिओ और बखत पारि गोलि हांडि दिओ और फिर पार्टीनक लै के भरौस न रै गोय आब। जो पार्टी भलि बात करे, उ चुनावै न जिति सकनि। फिर जितण्णक बाद नेताओंकि बजार लागि जैं। राजनीति लै पैलियैकि चार दल्द जैसि सिद्धांतों वालि सखत जै कि रैगे आब...

सुरेश – तुमूकें लै भल अन्ताज छु हो हरीश... नैं नैं हरित चंद्र ज्यू राजनीतिक ! मैं लै खाली तुमरी भैं आपण डिप्लोमाक भरौस रूनी ज्यादा है ज्यादा ईई, एसई बणि रूनीं। आज दुल-दुल इंजीनियर, डाक्टर कि आईएस, आईपीएस लै हात बांदि बेर ठाड़ रूनीं कामनै म्यार सामांणि। य सब राजनीतिक कमाल और जन्ताकि कि भगवानैकि किर्य छु यार। लालबत्ति मिलि रै। (मणीं रुकि बेर) जन्ता कि हैं यार, मौनूकि भैं हुं। राजनीति रांणि जि चैं सि करै सकें उ हैं। उकें मूरख बडूण ऊण चैं बस। एक बारि भोट में जितै दियो बस, कि फरक पडूं को दल में छां। झपैक मारण्णक काम भाय। दल बदलुन के अच्यान इज्जत लै औरन है बांकि मिलें, दगडै है जा

सात पुस्तनौक इंतजाम। और यार फिर पांच सात भौत हुनीं जन्ता कैं भरमूण्णक तैं। वीकि याददास्त उसी लै भौतै कम हैं, उ सब थै लिहं, सब सै लिहं और फिर पिनाऊ पाताक चारि सब मुलि जैं।

**दीपक** – य भलि कैं यार तुमूंलि लै। हमार यां त अगर सरकार य नियम बणै दियो कि रोज रात्ति ब्याव हर आदिम कैं द्वि-द्वि डंड खाण पडाल, त जाणछा कि हवल.....?

**ललित** – कि हवल ?

**दीपक** – अरे मूरखा, तु आपण डिमाग त कब्बे लगूनें न्हैतै। कि पुर डिमाग बिन खर्चिये वापिस भगवान कैं लौटूणक इराद छु त्यरै ? कि हवल, द्वि-चार दिन जन्ता हल्ल-गुल्ल करैलि, धरना-प्रदर्शन, अनशन, बजार-प्रदेश-देश लै बंद करै सकें। पर ढील-ढीलै चुप है जालि। डंड खाण हुं तैय्यार है जालि। कौलि-पडोसि लै खाणौ, कि फरक पडूं में लै खै ल्यूल त। फिर बांणि पडि जालि, आपण काम-धंध में लागि जालि। बांकि हवलौ, डंड मारण-खाण में लै बीच में टेक्दारी, कमीशनबाजि हुंणि लागलि। सब क्वा पेटाक त्वा भय्य यार। खैर...रमेश, तु सुंणा आपणि क्थ, बता कि करनौछै ?

**रमेश** – बकार चरुणयूं।

**सुरेश** – कि कुनौछै ? त सूट-बूट पैरि बेर बकार चरुणौछै ?

**हरित** – यार रमेश, किलै झुटि बलांछै, सुंणा यार आपणि क्थ।

**रमेश** – कि सुणूं यार, कालेज बै निकइ बेर एक भौत टुलि मल्टी नेशनल कंपनी में लाग्यूं। पर वांक रंग-ढंग म्यार समझ में न आय। खून चुसनीं साल मैसूंक। जो जतू सकर खून चुसूं वीकि उत्तू टुलि कंपनी। फिर नेताज्यू (सुरेशक उज्याणि शान करि बेर) तुमरि त निगुरि राजनीति (रुकि बेर), राजनीति नै अराजनीति लै हर जाग पांजी रैं। म्येरि तैक दगै लागनेर नि भै। छोडि आयूं मै। सोचौ-आपणै इलाक में जै बेर के करूल, आपणै घर छजूल।

**ललित** – फिर कैं सरकारि नौकरि करि हुनैलि.....

**हरित** – सरकारि नौकरि त तीर्थ करण जसि हुनेर भइ। को न करण चान। पर मौक कतुकन कैं मिलूं। पैली त सरकारि पदै गिणणीं लैकाक हुनेर भय्य, फिरि उनूमें बै कतुकप भितर-भितरै नेताज्यूक (सुरेशक उज्याणि शान करि बेर) भाइ-भतिजौलै भरि जनेर भय्य। फिर मणीं बची-खुची अखबारन तक पुजि लै गया बिरुजगार बानरौंकि बांट में आरक्षणौक बिराउ लै कि भैटि रुनेर भय।

**रमेश** – ततुकै हुन, के बात न हुनि। नौकरी तैं फौरम भरण लै सबूक बसैकि बात जै कि भै। पैली फौर्म खरीदण हुं डबल चैनीं, एडवरटैज वाल अखबार है खरीदणै पडूं। चार-छै फोटू बणूण पडनी। फिर द्वि-चार सौ रुपैक डान भरण पडूं बिरुजगार हुंणाक जुरम में ड्राफ्टैकि शकल में। सरकारि औफीसरनाक खुटी सिलाम अलग करण पडनीं, सर्टिफिकेट-फोटू अटेस्ट करुण हुं। रजिस्ट्री करण हुं अलग लैन लगूण पडें, जाणि लैनैल नौकरी बानीण लागि रै हुनैलि। दाज्यू एक फौरम भरण में ड्राफ्ट है अलग कम है कम सौ रुपै मांथिक ठंड है जानीं।

**दीपक** – और डबलौक तुमूं तैं हमेशा ट्वाटै भय, फिरि कि भौ अधिल ?

**रमेश** – होइ यार, ठीक कुंणाछा। बौज्यूल कसिकै बकार चरै-बेचि बेर पढाई भय मकैं।

पैली-पैली नौकरीक फौरम भरण हुं मै डबल मांगि'ई लिहछी और बौज्यू दि लै दिछी। पर पछां-पछां मकैं लै शरम ऊण लागी और ढील-ढीलै हम द्वियै बाब च्याल मागण-दिण में शरमाण लाग्यां।

**हरित** – सई कुंणौछै यार ! गरीब मैसोंक त औतरण बाट लै न रै गोय आब, डुनै हुं गाड डुनै हुं भ्योव हुनीं-हमूल सुंणी भै त्वील भोगी भै। खैर बता, फिरि कि करौ त्वील ? कैं भौछै जुगाड ?

**रमेश** – जुगाडैकि भलि कैं यार तुमुंल लै। एक नेता मिलि पडौ ए दिन, बजार में भाषण दिणौछी-हमूं कैं सरकारि नौकरीक भरौस छवेडि आपण रुजगार करण चैं.....बैंक इफरात में

लोन दिणई। मैल लै सोचौ—के आपणै काम करी जाओ, न्यार रूल—आपणि नीन सितुल, आपणि भूख खूल।

ललित — फिर ?

रमेश — लगाई उद्योग केंद्रोंक चक्कर। पैली त वांक बाबू के बतूण हुं मनसाए नैं, फिर वील व्यवसाय लगूण हुं फौरमाक तें एक व्यवसायिक केंद्रोक पत्त बतै बेर आपण पल्ल झाड़ौ।

हरित — कि बात कै यार तुमूल लै। (दार्शनिक भावैल) व्यवसाय लगूणैक फौरम व्यवसायिक केंद्र पारि... भलि तुकबंदी है जाणै यार, कविता बणि जाणै। पर, हृद भै यार, एक—द्वि रुपैक फौरम न धरणीं कि लग्वाल व्यवसाय ?

रमेश — खैर फौरम लिह बेर कसिकै भरौ। उमै लै यसि—यसि चीज—जानकारि मांगी भाय कि भरते—भरते बाबू से याद ऐ जाओ। निगुर व्यवसाय लगूणी जागैकि रजिस्ट्री मांगणाय। आपणै बुबुकि जमीनौक किरायनाम बणूण पड़ौ तहसील बै मांथि—मुणिकि फीस दिबेर। तीस हजार सालाना है कम आयक प्रमाण—पत्रा लै बणवा कसिकै और फौरम जमा करवा।

हरित — फिरि लागि लै कि गोय हुनल पै तुमर पक्क व्यवसाय।

रमेश — (हंसन—हंसनै) अरे नैं यार, बेअकलाक बिल्कुल आंखिर में उ बैंकक नौ पुछण लागीं जो लोन दयल, म्येरि गारंटी ल्यल। लाग्युं फिर यास बैंकोंक सुदयाव पर क्वे रनकर मनसाए नैं।

ललित — हाय, किलै ?

रमेश — अरे उं डबलौक ब्यौपारि भाय। उनूं कें गारंटी चैनेर भइ। एफडी—जमीन—जैदाद चैनेर भाय, गिर्बी धरण हुं। गैरेंटर चैनेर भाय द्वि—द्वि म्वाट आसामि। क् बै करछीं मैं इतुक जुगाड ?

हरित — भौतै अजीब नियम—कानून छन सालौक। एक तरफ त परिवारैकि कमै तीस हजार रुपै है कम मांगनी सालाना, दुहरि तरफ द्वि—द्वि लाखैकि गारंटी मांगनीं एक लाखक लोन में। जैक कमै सई में तीस हजार है कम हवेलि, वीक पास कां बै हवेलि ततू हैसियत ?

रमेश — यैं गल्लि करि भैट्यूं मैं लै। झुठि न बुलै सक्युं। मैल सांचि—सांचि कै दे म्यर आज प्रमाण पत्रा असल छू। फिर किलै दिंछी उं मकै लोन ?

दीपक — जाणि—बुझि बेर झुठि बलाओ कूं कानून। यास में सच्च गरीब आदिम जै कि लिह सकूं सरकारि लोन। (भलि कै द्वियुं हात करू) भगवान परमेश्वरौ ! लक्ष्मी और सरस्वतीक तुमूल कब्बै मेले न कराय। यास नियम बणणी कुअकलियों कें मणीं अकल दिया ईश्वरो !

हरित — त तुमर य स्वीण लै स्वीणै रै गोय हुनल, पै ?

रमेश — पै कि, क्ये नैं, वापिस घर ऐ गोयूं, बाबुक दगाड बकार चरुण लाग्युं।

(होटलक कर्मचारि ट्रे में चहा और बिस्कुट लै गो, सब चहा पिण लागि जानीं)

सुरेश — पै कि तब बटी बकारै चरुणौछै, पै त्येरि शकल त क्याप औरै कूणै।

रमेश — घर ऐ बेर बकार चरुण लाग्युं। भलि जाति—खानिक हाइब्रिड नस्लाक बकार मोल्यै ल्यायूं। मणीं भलि नस्लैकि भेड़ लै पालीं, उनूंमें भलि बढत छी। उनर ऊन लै भल किस्मक छी। बाबु कै भल अन्ताज भय य कामौक। उनूल बड़ि मदद करी म्येरि। घराक और झणिनाक तें लै य सितिल काम भय, उनैरि मिहनत और म्येरि नई तकनीक रंग लै। भलि तरक्की मिली मकें। चारै साल में फौज बै बाकारोंकि सप्लाइक टयौक मिलि गोय। ऊन पैली मैं नजिकाक बजार में बेचछीं, पर मणीं—मणीं कै म्यार लै भेजण शुरु करौ। ढील—ढीलै म्यार भेड़ोंक भलि क्वालिटीक ऊनैकि बड़ि चोल है ग्येइ। ऊनैकि सफाई, कातण और कालीन बणूण हुं फैक्ट्री खोलणैकि सोचण लाग्युं। पत्त नैं कसिक बैंक वालों कै हव लागि पड़ी। कएक सरकारि—पिराइवेट बैंक वालों म्यार औफिस उज्याणि दौड़ लगै दे। कूण लागीं—लोन चैन पड़ल बताया, क्वे फारमैलिटीकि चिंता इन करिया। हम सब आफ्फी करि ल्यूल। त य छी मितुरो म्येरि जीत, जो बैंक वाल पांच साल पैली मकै मूख न लगूणाछी, आज आपण खुटां हिटि बेर म्येरि देइ में ऐ राछी।

सुरेश — जैल थै वील पै, ठीक कई जैरौ यार, भौत थाण पड़ौ तुकै लै, पर खानदानि घराक रुजगार में आंखिर भलि तरक्की मिली तुकै, तुकै बधाइ। त्येरि फैक्ट्री खूब चलौ, हम य चानूं।

**दीपक** – त्वील आपणि मिहनतैल आपणै नै, आपण मै—बाबुक दगाड हमैरि लै मुनइ उच्चि करि हाली। तु आजैकि हर तरफ फैली बेरुजगारिकि अमूसि जैसि काइ अन्यारि रात में शुकुर त्ार जस चमकणौछै, तुकै बधाइ।

**सब** – हमैरि लै बधाइ।

(सब ठाड है बेर ताइ बजूण लागनीं, पर्द गिरु)